

## ADYAYA I

### PURWAKA

#### 1.1 Dadalan Pikobet

Palajahan sane pinih becik patut kapolihang olih para sisia ring aab jagate sekadi mangkin. Pamlajahan punika prasida kapolihang saking saluir genah, ngawit saking kulawarga, krama miwah ring sekolah. *Pendidikan* punika pinaka usaha sajeroning nincapang sakaluring pangweruhan, kawagedan, miwah tata susila manusane sajeroning ngamargiang kahuripan. Kawentenan *pendidikan* pinaka silih sinunggil sarana sane becik kaanggen ngamedalang parilaksana mangda prasida ngaturang pikenoh ring soang-soang dewek para sisiane. *Pendidikan* patut maduwe peran *aktif* sajeroning ngawi para janane urati kapining pikobet kahuripane. *Sistem pendidikan* ring Indonesia puniki setata wenten paobahan nginutin panglimbak aab jagat. Sekadi kawentenan sistem pamlajahan *Merdeka Belajar*. *Kurikulum Merdeka belajar* sane kamedalang olih pemerintah, tetujonnyane mangda prasida ngamedalang tata pamlajahan sane nenten ngiket para sisiane. *Kurikulum* puniki sampun prasida kabuktiang antuk kawentenan kabijakan saking pamerintah inggih punika ngawit warsa 2021 pemargi Ujian Nasional kagentosin antuk ngawentenang tata nureksain (*Asesmen Kompetensi Minimum*) lan *survey karakteristik* (Wibawa, 2019). Kawentenan punika dahat mapaiketan sareng tata cara nincapang *mutu pendidikan*, mangda pemargi *pendidikan* prasida ngamedalang manusa sane madue *kreatifitas* sane mabuat sajeroning nincapang sapangweruhan sane kaduenang, taler prasida ngicalang ceciren newek-newek sane ngawinang manusa punika papinehnyane nenten

ngelimbak. *Kurikulum Merdeka Belajar* pinaka pahan saking masarakat 5.0 kabaosang angkepan pantaraning panglimbak miwah kaluihan *teknologi* sareng pikobet ring kramane. Kawentenan *Kurikulum Merdeka Belajar* kaaptiang prasida ngametuang pamargi pamlajahan sane dangan kamargiang malarapan antuk ngawigunayang *teknologi* sane becik. *Kurikulum Merdeka Belajar* punika kamerdekaan sajeroning mapepineh. Kamerdekaan mapepineh punika patut kaduwenang dumun olih para guru pinaka *pendidik*. Pemargi pamlajahan prasida memargi becik yening *pendidik* prasida ngresepang *kurikulum* sane becik.

Kawentenan guru sane *profesional* sayuakti mabuat pisan sajeroning parikrama pamlajahan ring sekolah. Nika mawinan guru sepatutnyane prasida ngawigunayang saluiring materi pamlajahan sane wenten. Wenten pat-pat kawagedan guru sane patut kaduwenang olih guru *profesional* sajeroning parikrama pamlajahan kawagedan *pedagogik*, pinaka silih sinunggil kawagedan sane dahat mabuat lan patut gaduenan dados guru.

Kawagedan *pedagogik* punika nyihnayang guru nguningin indik *strategi* pamlajahan sane patut kamargiang sajeroning pamlajahan, antuk punika guru patut uning karakter siswa. Karakteristik siswa pinaka dasar guru ritatkala makarya pangrancana pamlajahan. Mangda becik pangrancana pamlajahan patut kauratiang indik *model, teknik, metode, media* lan piranti *evaluasi* sane jagi kaangge.

Yening cingak, pemargi pamlajahan ring sekolah utamannyane ring SMP Negeri 2 Selat kantun ngamargiang pamlajahan *konvensional* utawi ngangge *metode* pamlajahan *ceramah*. Pemargi pamlajahan sekadi punika ngawinang siswa meweh malajah, pemargi pamlajahan sekadi punika taler uratian siswa nenten prasida kadaut lan pikenoh sane kapolihang sajeroning peplajahan nenten

nglimbak. Punika mawinan guru patut ngawigunayang *model* pamlajahan sane becik lan anut sareng *karakter* pamlajahan sisia. *Model* pamlajahan sane kaanggen patut prasida naut uratian sisia lan ngawinang sisia demen malajah. Antuk punika guru patut nguratiang kahanan sisia miwah kahanan parikrama pamlajahan.

Model pamlajahan *Blended Learning* pinaka sinalih tunggil pamlajahan *inovatif* sane karasa becik kamargiang ring kehanan jagate kadi mangkin. Model pamlajahan *Blended Learning* inggih punika pamlajahan sane ngangkepang saluiring tata cara nyobyahang, model pamlajahan, taler saluiring media teknologi antuk proses pamlajahan (Husamah, 2014). Kairing antuk panglimbakan *teknologi* sekadi mangkin, sepatutnyane para sisia dangan ngerereh orti-orti miwah *materi* sane mapaiketan sareng pamlajahan, sekadi kawentenang *aplikasi-aplikasi* sane prasida ngwantu pamlajahan, *web*, video pamlajahan miwah sane lianan. Sisia lan guru sepatutnyane prasida ngawigunayang sarana sane sampun kawentenang punika. *Teknologi* taler patut kawigunayang sajeroning pamlajahan, mangda pemargi pamlajahan prasida mapikenoh. Nika mawinan pamlajahan langsung (*offline*) sane kaingkupang sareng pamlajahan *online* kadi punika karasa becik pisan kamargiang.

*Model* pamlajahan *blended learning* prasida kaangge sajeroning pamlajahan nyurat aksara Bali. Antuk ngawigunayang kawentenan *aplikasi-aplikasi* nyurat aksara bali sane sampun kacumawisang, sekadi *aplikasi Patik Bali, Aksara, Bali Simbar, Noto Bali, Nulis Aksara Bali, Transliterasi Aksara Bali, Nulis Aksara* miwah sane lianan. *Aplikasi-aplikasi* punika prasida ngwantu pamargin peplajahan ring sekolah tur dados *inovasi* marupa *media* peplajahan. Kawentenan

*aplikasi* nyurat aksara Bali pinaka wentuk *inovasi* piranti pamelajaran sane prasida kanggen ring peplajahan nyurat aksara Bali

Sekadi silih sinunggil papelajaran bahasa Bali sane kapolihang ring kelas VIII patut katincapang kawagedan pasang aksara Bali, santukan nyingakin kehanan sisiane sekadi mangkin kantun akeh sisia sane dereng waged nyurat aksara Bali, indike punika mejanten sampun majeng ring sisia utaminnyane ring sisia kelas VIII E SMPN 2 Selat kaaptiang prasida nyalin aksara latin kaaksara Bali mangda becik, napi malih kairing antuk kawentenan *teknologi* sane setata nglimbak punika.

Sajeroning nyurat aksara Bali, patut nguratiang indik pasang pageh aksara Bali, punika sane karasayang dahat meweh kapelajahin olih sisia sajeroning malajah nyalin satua antuk aksara Bali. Pikobet sisia SMPN 2 Selat sajeroning nyalin satua antuk aksara Bali inggih punika meweh ngapalang wangun aksara Bali, pasang aksara Bali, tur para sisia nenten kadaut manahnyane nyarengin peplajahan nyalin satua napi malih nganggen aksara Bali. tiosan punika, manut pabligbagan sareng guru pelajahan basa Bali, peplajahan nyurat aksara Bali meweh kamargiang santukan guru nenten uning tur ngrereh srana peplajahan sane patut ring peplajahan nyurat. Guru-guru sampun katah ngajahin para sisia sajeroning peplajahan nyalin satua antuk aksara Bali guru wantah ngicen pawarah-warah materi saha kalanturang antuk tugas nyurat aksara Bali ring kertas sane ngawinang para sisia med miwah nenten urati ring peplajahan sane kamargiang. Nika sane ngawinang pamargin peplajahan kirang *efektif* miwah ngawinang kaweruhan indik nyurat aksara Bali sayan ngreres. Indik punika pamargi peplajahan patut kaobah tur katempasin antuk nglimbakang *inovasi*



peplajahan sane marupa ngawigunayang srana-srana sane wenten ring *media elektronik* sekadi *aplikasi PaTik Bali* sajeroning nyurat aksara Bali

*Aplikasi PaTik Bali* utawi *Papan Ketik* maaksara inggih punika silih sinunggil *aplikasi* sane prasida kanggen media utawi piranti nyurat aksara Bali sane wenten ring *android*. *Aplikasi* puniki maduwe genah wangun utawi karakter aksara Bali ring *tombol PaTik Bali* sane kaanutang sareng *layout keyboard* tamiang saha maduwe wangun *papan ketik* sane kaasusun antuk aksara latin ring luhur miwah aksara Bali ring sor saha munggah *menu Pop-Up* sane madaging wangun gantungan, gempelan miwah aksara Bali sane tiosan pinaka kaluwihan mautama sane nenten prasida kapolihang ring aplikasi nyurat aksara Bali tiosan. *Aplikasi PaTik Bali* prasida kanggen nincapang kawagedan sisia sajeroning nyurat aksara Bali (Rai, 2019). Antuk punika *aplikasi PaTik Bali* sane kapilih anggen negepin peplajahan nyalin satua antuk aksara Bali santukan prasida dangan kanggen ring *android*.

Sajeroning ngamargiang tetilikan, pinaka sesuluh saha kaangge dasar utawi tatimbang sajeroning ngamargiang tetilikan, wenten makudang-kudang tetilikan asoroh sane kadadosang gegamelan olih panilik. Inggih punika tetilikan sane kalaksanaang olih Ida Ayu Putu Widiantari (2019) sane mamurda “Ngawigunayang *Aplikasi PaTik Bali* anggen Nincapang Kawagedan Nyurat Pupuh Durma antuk Model Pamplajahan *Kooperatif Tipe Think Pair And Share* (TPS) Sisia kelas XI BDPM C ring SMK Negeri 1 Singaraja Warsa 2018/2019”. mapikolih becik kacihnayang antuk pikolih pratiaksa rerata 73,35 dados 78,32 lan penampen sisia sane becik lan *positif* ring paplajahan nyurat pupuh durma maaksara Bali antuk aplikasi PaTik Bali Sisia Kelas XI BDPM C SMK Negeri 1

Singaraja. Wnten taler tetilikan sane kamargiang olih I Kadek Eka Muliana (2022), mamurda “Nincapang Kawagedan Nyurat Aksara Bali Nganggen *Aplikasi Patik Bali* antuk *Model Blended Learning* Sisia Kelas VIII SMP Katolik Soverdi” saking tetilikan punika taler prasida mapikolih becik kacihnayang antuk pikolih pratiaksa rerata sisia 73,06, lan nika kabaosang sampun tuntas ring paplajahan Nyurat Aksara Bali nganggen *Aplikasi Patik Bali* antuk *Model Blended Learning*. Tiosan punika taler wnten tetilikan saking Komalawati, Dewi (2021) mamurda “*Penerapan Model Blended Learning dalam Pembelajaran Menulis Teks Tanggapan dan Pengaruhnya Terhadap Kemampuan Berpikir Kritis Siswa Kelas IX Mts Negeri 1 Bandung Kabupaten Bandung*”. Ring tetilikan punika taler prasida mapikolih becik kacihnayang antuk pikolihan pratiaksa rerata sisia 77,50%, lan panglaksana guru sajeroning ngamargiang pamplajahan inggih punika 95,63%.

Tatiga tetilikan punika prasida nyihnayang, ngawigunayang *model blended learning* saha kawentenan *aplikasi* kaangge *inovasi* saking *media* peplajahan punika dahat mabuat pisan. Saking tetilikan punika prasida kacutetang, ngawigunayang *model blended learning* saha nganggen *aplikasi* pinaka *media* utawi piranti palajahan prasida nincapang kewagedan sisia sajeroning nyurat, lan prasida *memotivasi* sisia mangda seneng malajah. Sakewanten tetilikan sekadi punika dereng naenin kamargiang ring SMP Negeri 2 Selat, punika mawinan masuluh saking tetiga tetilikan punika panilik pacang kamargiang tatilikan indik *model* pamplajahan *Blended Learning* lan *media Aplikasi Patik Bali* pinaka piranti peplajahannyane ring paplajahan nyurat Aksara Bali ring SMP Negeri 2 Selat.

Madasar antuk daldalan pikobet sane sampun katlatarang punika panilik

ngemargiang tetilikan sane mamurda “**Nincapang Kewagedan Nyurat Aksara Bali antuk Model *Blended Learning* Nganggen Aplikasi *PaTik Bali* ring Sisia Kelas VIII E SMP Negeri 2 Selat**”. Tetilikan puniki nganggen aplikasi *Patik Bali* pinaka piranti kaanggen nincapang kawagedan sisia nyurat aksara Bali. Lan *model* pamlajahan *blended* pinaka tata titi pemargin pamlajahannyane. Mangda sida kadaut manah sisiane mapauruk nyurat aksara Bali.

## 1.2 Ngerereh pikobet

Sajeroning tetilikan puniki, panilik ngrereh makudang-kudang pikobet sane mapaiketan sareng dadalan pikobet sane sampun kawedar ring ajeng. Pikobet sane kapanggih mangda mapaiketan sareng peplajahan pasang aksara Bali sajeroning nincapang kewagedan pasang aksara Bali sisia kelas VIII E SMPN 2 Selat. Pikobet sane sampun prasida kapolihang minakadi, (1) Sapunapi pidabdab ngawigunayang *aplikasi PaTik Bali* sajeroning *model Blended Learning* anggen nincapang kawagedan nyurat aksara Bali sisia kelas VIII E SMPN 2 Selat? (2) Sapunapi kawigunan aplikasi *PaTik Bali* sajeroning *model Blended Learning* kanggen nincapang kawagedan nyurat aksara Bali sisia kelas VIII E SMPN 2 Selat? (3) Sapunapi panampen sisia ring kawentenan *aplikasi PaTik Bali* sajeroning *model Blended Learning* sane kanggen nincapang kawagedan nyurat aksara Bali sisia kelas VIII E SMPN 2 Selat?. (4) Sapunapi kaluihan nganggen metode *blended learning* sajeroning pamlajahan pasang aksara Bali? (5) Sapunapi perangkat pembelajaran sane kaanggen guru ring pembelajaran nyurat aksara Bali?

### 1.3 Ngwatesin Pikobet

Sajeroning tetilikan sane jagi kalaksanayang puniki, panilik nureksain malih pikobet sane sampun kapolihang. Pikobet punika kawatesin santukan wenten makudang-kudang parindikan minakadi, tetilikan kabanda antuk galah, ngicenin galah majeng ring panilik sane tiosan mangda nyangkepin lan maripurnayang tetilikan puniki saha ngamargiang tetilikan manut kaweruhan widya sane lianan. Pikobet sane kawatesin inggih punika (1) Sapunapi kaluihan nganggen metode *blended learning* sajeroning pamajahan pasang aksara Bali? (2) Sapunapi perangkat pembelajaran sane kaanggen guru ring pembelajaran nyurat aksara Bali?

### 1.4 Bantang Pikobet

Malarapan antuk dadalan pikobet sane sampun kawedar ring ajeng, bantang pikobet sane prasida kapolihang inggih punika :

1. Sapunapi pidabdab ngawigunayang *Aplikasi PaTik Bali* sajeroning model *Blended Learning* anggen nincapang kawagedan nyurat aksara Bali sisia kelas VIII E SMPN 2 Selat?
2. Sapunapi kawigunan *aplikasi PaTik Bali* sajeroning model *Blended Learning* kanggen nincapang kawagedan nyurat aksara Bali sisia kelas VIII E SMPN 2 Selat?
3. Sapunapi panampen sisia ring kawentenan *Aplikasi PaTik Bali* sajeroning model *Blended Learning* sane kanggen nincapang kawagedan nyurat aksara Bali sisia kelas VIII E SMPN 2 Selat?



### 1.5 Tetujon Tetilikan

Malarapan antuk bantang pikobet sane sampun karincikang ring ajeng, tetujon tetilikan puniki inggih punika:

1. Mangda uning sapunapi pidabdab ngawigunayang *Aplikasi PaTik Bali* sajeroning *model Blended Learning* anggen nincapang kawagedan nyurat aksara Bali sisia kelas VIII E SMPN 2 Selat
2. Mangda tatas uning kasidaan *aplikasi PaTik Bali* sajeroning *model Blended Learning* sajeroning kanggen nincapang kawagedan nyurataksara Bali sisia kelas VIII E SMPN 2 Selat
3. Mangda uning sapunapi panampen sisia ring kawentenan *Aplikasi PaTik Bali* sajeroning *model Blended Learning* sane kanggen nincapang kawagedan nyurat aksara Bali sisia kelas VIII E SMPN 2 Selat

### 1.6 Kawigunan Tetilikan

Ring sajeroning tetilik puniki wenten kawigunannyane, minakadi :

#### 1. Kawigunan Pamucuk (*Teoritis*)

Pikolih tetilik puniki kaaptiang prasida ngicen kawigunan ring sapanglimbak model pamlajahan *blended* lan widia indik *aplikasi Patik Bali* sane kaanggen nincapang kawagedan nyurat. Taler kaaptiang prasida kaanggen sapanglimbak widya pengajah-ajahan sajeroning paplajahan basa Bali marupa aksara Bali, mangda prasida ngranayang sisianayane sayan meled sajeroning pamargi pangajah-ajahan

## 2. Kawigunan Panglimbak (*Praktis*)

Kawigunan pamglimbak sane kapolihang saking tetilikan puniki inggih punika :

### a. Majeng ring Sisia

Kawigunan tetilikan puniki majeng ring sisia inggih punika prasida kaanggen *ilmu* mangda sisia uning tur sida waged sajeroning nyurat aksara Bali.

### b. Majeng ring Guru

Kawigunan tatilikan puniki majeng ring Guru basa Bali inggih punika kaaptiang mangda prasida uning kaiwangan-kaiwangan, lan pikobet-pikobet sane kapanggih sajeroning ngemargiang pamlajahan nyurat nganggen media aplikasi *patik Bali* antuk *model blended learning*. Taler guru prasida ngicenin panuntun sane manut ngenenin indik kakirangan sane kapanggih olih sisianyane.

### c. Majeng ring Panilik sane Siosan

Kawigunan majeng ring panilik sane siosan mangda prasida kaanggen *acuan* ring sajeroning tetilikan selanturnyane sane mapaiketan sareng tetilikane puniki.

### d. Majeng ring Panilik

Pikolih tetilikan puniki, mangda prasida kaanggen dasar lan sesuluh majeng ring panilik ri tatkala benjang pungkuran jagi ngmargiang paajah-ajah ring sekolah-sekolah nganggen metode pamlajahan sane inovatif.